

## DOMINGU XVII TEMPU KOMÚN – TINAN B

### TEMA

Liturjia domingu da-17 konta mai ita Maromak nia preokupasaun atu habosu ema sira nia “hamlaha” ba moris. Ho forma espesiál, leitura sira domingu ne’e nian dehan mai ita katak Maromak konta ho ita atu fahe ninia “paun” ho sira hotu ne’ebé iha “hamlaha” ba domin, ba liberdade, ba justisa, ba dame, ba esperansa.

Iha *leitura dahuluk*, profeta Eliseu, hodi fahe paun ne’ebé eferese ba nia ho ema sira ne’ebé hale’u nia, testemuña Maromak nia vontade atu habosu mundu nia “hamlaha”; no sujere katak Maromak mai hasoru ema kiak no mukit liuhusi jestu sira partilla no jenerozidade nian ba maun-alin sira ne’ebé “profeta” sira simu konvite atu realiza.

*Evanjellu* repete tema hanesan. Jezús, Maromak ne’ebé mai hasoru ema sira, nota ema lubunboot ne’ebé tuir Nia, sira-nia “hamlaha”. Ba eskolante sira, Jezús konvida sira atu kolu lójika egoízu nian no hatais lójika partilla nian, konkretiza iha servisu simples no haraik-an ba maun-alin sira nia benefísiu. Lójika ida-ne’e mak halo atu bele hakat sai husi eskrauidaun hodi bá liberdade; ne’e maka lójika ne’ebé sei hamoris mundu foun.

Iha *leitura daruak*, Paulo fó hanoin ba fiar-na’in sira ejizénsia ruma vida kristán nian. Nia rekomenda sira, ho modu espesiál, haraik-an, laran-kmaus no pasiénsia: atitude sira ne’ebé la la’o hamutuk ho eskema egoízu nian, loko-an nian, autosufisiénsia nian, prekonseitu iha relasaun sira ho maun-alin sira.

### LEITURA I – 2 Reis 4,42-44

Tradisuan profétika sira kona-ba Elias no Eliseu okupa espasu significativu iha Livru Liurai sira-nian (kf. 1 Liurai 17,1-21,29; 2 Liurai 1,1-13,21). Períodu ida lahakmatek – iha termu polítiku no relijiozu – iha Reinu Tasi-Feto (Israel). Elias hala’o nia misaun profétika durante Acab nia ukun (874-853 mK.) no Acazias nia ukun (853-852 mK); Eliseu fó sasin profétiku durante Jorão nia ukun (853-842 a.C.), Jeú nia ukun (842-813 mK) no Joacaz nia ukun (813-797 mK).

Liurai sira Israel nian buka atu nafatin estabelese relasaun komersiál, ekonómika, polítika no militár ho povu viziñu sira. Abertura fronteira ida-ne’e, iha mós nia presu atu selu husi parte fidelidade nian ba Jahwé no ba Aliansa, tanba kultu ba Maromak estranjeiru sira tama iha reinu no okupa fatin significativu iha israelita sira nia vida no fuan. Ne’e mak época ida sinkretizmu relijiozu nian, iha-ne’ebé relijiaun jahwista, ho ksolok no até ho liurai sira nia apoiu favorese kultu sira ba Baal no Astarte. Husi parte sosiál, ne’e mak época ida ne’ebé injustisa sosiál hakbarak hasoru kiak sira no fraku sira. Buat ne’e hotu hatudu kuadru ida infidelidade boot ba Maromak no kontra Aliansa.

Iha kuadru ida-ne’e mak Elias no Eliseu hamriik. Elias mosu nu’udar representante ba israelita sira ne’ebé fiél ba valór relijiozu tradisionál sira, lakohi atu iha koezisténsia entre Jahwéh no Baal iha Isarel nia fiar; Elias nia luta hetan kontinuasaun ho ninia eskolante ida – Eliseu.

Parese Eliseu – atór prinsipál leitura dahuluk domingu ne’e nian – hola parte ba comunidade ida “profeta nia oan sira” (“benê nebi’im” – 2 Liurai 2,3; 4,1). Komunitade ida mane sira nian ne’ebé moris kiak (2 Liurai 4,1-7) no sira ne’ebé tuir Jahwéh laho kondisaun. Povu konsulta sira ho modu regulár no hetan sira-nia apoiu hasoru kbiit-na’in sira-nia abuzu. Eliseu maka profeta ida “milagre nian hanesan haktuir iha “siklu Eliseu nian” (kf. 2 Liurai 2; 3,4-27; 4,1-8,15; 9,1-10; 13,14-21); ninia hahalok sira hatudu Maromak nia forsa nia prezensa iha Povu

nia leet. Dala ruma Eliseu maka profeta intervensaun polítika nian; niia hahalok hakat liu fronteira fizika Israel nian no to'o iha Damasco (kf. 2 Liurai 8,7-15).

### *MENSAJEN*

Testu ne'ebé propoin mai ita nu'udar leitura dahuluk haktuir katak ema ida husi Baal-Shalisha lori ba Eliseu “paun foun” 20, husi trigu foin ko'a no mós trigu saka ida. Tuir Lv 23,20, paun foun tenke apresenta ba Na'i no konsagra ba Jahwéh, maski ikus nian fó ba amlulik... Karik ida-ne'e maka kostume ne'ebé haktuir iha epizódiu fó paun ba Eliseu ne'e nian. Eliseu, maski nune'e, la rai presente sira ne'e ba nia, maibé haruka fahe ba ema sira hale'u nia. Profeta nia “atan” la fiar katak hahán ne'e to'o ba ema atus ida; maski nune'e to'o no iha restu tan.

Ita haree iha ita-nia oin, jestu sira tutuir malu ne'ebé hatudu jenerozidade no vontade atu fahe: husi mane ne'ebé lori presente ba profeta no profeta ne'ebé la rai ba nia an, maibé haruka fahe ho ema sira hale'u nia. Istória kona-ba milagre paun sai barak nune'e mós trigu musan sujere katak ema iha kapasidade atu sai husi ninia egoíзму no iha disponibilidade atu fahe presente sira simu husi Maromak, presente sira-ne'e natón ba ema hotu no resin tan. Laran-luak, partilla, solidariedade, la halo ema sai kiak, maibé halo moris buras no moris ne'ebé naresin ka iha abundánsia.

Relatu ida-ne'e fornese ba autór sira Testamentu Foun nian, modelu literáriu ne'ebé sai inspirasaun atu apresenta relatu evanjéliku multiplikasun paun sira-nian (kf. Mc 6,34-44; 8,1-10; Mt 14,13-21; 15,32-38; Lc 9,10-17).

### *ATUALIZASAUN*

- “Profeta” ema ida Maromak bolu no haruka atu sai Maromak nia oin iha mundu nia klaran. Iha “profeta” nia liafuan no jestu sira, Maromak rasik maka manifesta An ba ema sira no hatudu ninia hakaran no ninia proposta sira. Iha jestu fahe paun nian profeta hatudu Maromak nia preokupasaun rohan-laek atu halakon mundu nia “hamlaha” (hamlaha paun nian, hamlaha liberdade nian, hamlaha dignidade nian, hamlaha realizasaun nakonu nian, hamlaha domin nian, hamlaha dame nian...) no ninia vontade atu fó ba ema moris iha abundánsia. Ita lalika duvida: Maromak preokupa, loroloron atu oferese ba nia oan sira moris nakonu. Maromak mak haraik mai ita paun ne'ebé halakon ita-nia hamlaha ba vida.
- Oinsá Maromak habosu ema nia hamlaha ba moris? Ita-nia leitura dahuluk sujere katak Maromak atua ho maneira simples no normál liu. Liuhsui ema sira nia laran-luak no partilla maka paun to'o ba ema sira ne'ebé presiza. Normalmente, Maromak uza ema sira atu intervein iha mundu no atu halo nia presente sira to'o ba mundu. Dala barak ita mehi jestu espetakulár sira Maromak nian no moris ho matan fihir metin ba lalehan hodi hein Maromak hakarak intervein iha mundu; no ita la haree katak Maromak mai hasoru tiha ona ita no Nia hatudu ninia hahalok laran-luak nian liuhusi mane no fetu barak sira nia laran-luak, lahó publisidade, jestu partilla nian, solidariedade nian, saran an nian. Ita presiza aprende haree Maromak nia prezensa no domin iha jestu simples sira.
- Hodi hatudu katak liuhusi ema nia hahalok maka Maromak habosu mundu nia hamlaha, ita-nia testu konvida ita ba kompromisu. Maromak presiza ita, ita-nia laran-luak no laran-sadia, atu bá hasoru maun-alin sira ne'ebé presiza liu no oferese ba sira moris nakonu. Ita fiar-na'in sira, simu bolun atu sai – hanesan profeta Eliseu – testemuña Maromak ida ne'ebé hakarak partilla ho ema sira ninia “paun”; no “paun” Maromak nian ne'e tenke suli ba maun-alin sira iha jestu partilla nian, laran-luak nian, solidariedade nian, domin lahó limite nian.

## **LEITURA II – Ef 4,1-6**

Surat ba Eféziu sira (ne'ebé ita reflète ona to'o ohin no sei kontinua akompañia iha domingu sira tuirmai) parese “surat sirkulár” ida haruka ba kreda oioin parte loromonu Ázia Menór inklui sarani sira Éfeso nian, konsidera nu'udar Paulo nia surat “husi kadeia”, testu ne'e trata didi'ak no apresenta katekeze sólida ida ne'ebé elabora didi'ak. Bele dehan testu ida iha faze “tasak” Paulo nian. Autór ruma konsidera Surat ba Eféziu sira nu'udar sínteze ba Paulo nia hanoin sira. Testu ne'ebé ohin propoin mai ita nu'udar leitura daruak mak inísiu ba parte morál no ezortasaun surat nian (kf. Ef 4,1-6,20). Ita hetan “ezortasaun ba batizadu sira”, iha ne'ebé Paulo reflète “Kristu nia Isin” nia edifikasaun no baburas. Ho liafuan konkretu liu, Paulo hatudu pista ba sarani sira kona-ba oinsá moris sira-nia kompromisu ho Kristu, atu bele sai Ema Foun.

### *MENSAJEN*

Paulo nia kondisaun nu'udar prizioneiru tanba Jezús no Evanjellu, fó kbiit espesiál ba ninia rekomendasaun sira nu'udar apóstolu: liafuan sira ema ida nian ne'ebé lori ho sériu proposta Jezús nian, ho kbiit atu tau nia moris iha perigu tanba nia.

Iha Paulo perspetiva, vida foun ezije, uluknanai, atu fiar-na'in sira moris iha uniaun ho Kristu. Ora, presiza iha komportamentu no atitude ruma nu'udar kondisaun nesesária atu unidade bele sai efetiva (vers. 2-3). Uluknanai, Paulo refere ba haraik-an, tanba nia de'it maka permite atu supera egoísmu, loko-an, autosufisiénsia ne'ebé hadook maun-alin sira no harii barreira separasaun nian; hafoin, Paulo refere ba laran-kmaus, haraik-an nia alin, no kualidade ne'ebé hamonu barreira iha komuñaan; Paulo refere mós ba pasiénsia, ne'ebé halo atu sai tolerante no komprensivu ho maun-alin sira nia salan no permite atu komprende no simu maneira lahanesan kona-ba an rasik no hahalok sira... Atu habadak, halo atu karidade mak ukun relasaun sira; domin maka nafatin suporte iha relasaun umna sira. Unidade maka presente ida Maromak nian; maibé iha ninia atualizasaun depende ba maun-alin ida-idak nia kontribuisaun no esforsu.

Iha parte daruak testu nian, Paulo apresenta elementu lubuk ida nu'udar fundamentu ba sarani sira nia unidade: “iha Isin ida de'it no Espíritu ida de'it, nu'udar Maromak bolu imi hotu iha esperansa ida de'it” iha moris ne'ebé fiar-na'in hotu simu bolun atu iha; “iha Na'i ida de'it, iha fiar ida de'it, Batizmu ida de'it; iha Maromak ida de'it no Aman ema hotu nian; Nia ukun ita hot-hotu, Nia atua iha buat hotu no Nia iha ita hotu” (vers. 4-6). Hodi temi Aman, Oan no Espíritu, iha kontestu ida-ne'e, sujere katak Trindade maka bee-matan ikus no modelu unidade nian ne'ebé sarani sira tenke moris iha sira nia dalan komunitária.

## **EVANJELLU – Jo 6,1-5**

Liturjia propoin mai ita ohin (no durante domingu ruma tan) leitura kpítulu 6 Evanjellu nu'udar João haktuir – katekeze kona-ba Jezús, Paun moris nian.

Iha parte dahuluk Evanjellu nian (kf. Jo 4,1-19,42), João apresenta Jezús nia atividade atu bele kria no fó moris ba ema nune'e, sai Ema Foun, livre husi egoísmu no salan, ho Espíritu nia kbiit, bele tuir Jezús no moris dinámika Jezús nian – katak iha domin ba Aman no maun-alin sira. Parte dahuluk ida-ne'e fahe ba “livru” rua– “Livru Sinál sira nian” (kf. Jo 4,1-11,56) no “Livru Oras nian” (kf. Jo 12,1-19,42).

Iha “Livru Sinál sira nian” (kf. Jo 4,1-11,56), autór Evanjellu da-4 nian, hodi foti símbolu signifikativu sira ( “bee” – kf. Jo 4,1-5,47; “paun” – kf. Jo 6,1-7,53; “naroman” – kf. Jo 8,12-9,41; “bibi-atan” – kf. Jo 10,1-42; “moris-hi'as” – kf. Jo 11,1-56), espoin ninia katekeze kona-

ba Jezús nia asaun ba ema sira. Nia apresenta Jezús nu'udar proposta moris loos nian ba ema no konvite atu simu no asimila moris ne'e.

Iha kapitulu 6 – ne'ebé ohin ita hahú lee – João apresenta Jezús nu'udar Paun ne'ebé habosu ema nia hamlaha ba moris. Epizódiu ne'ebé ohin haktuir mai ita akontese jeografikamente iha Bee-lihun Tiberíades nia sorin bá (iha kapitulu molok Jezús iha Jerusalém, iha sentru instituisaun judaika; oras-ne'e, lahó tranzisaun, nia mosu iha Galileia, hakur liu “tasi” Galileia nian ba sorin seluk). Husi parte kronolójika, João nota katak besik festa Páskua, festa importante liu kalendáriu relijiozu judaiku, ne'ebé selebra Maromak nia Povu nia libertasaun husi opresaun Ejitu nian.

## *MENSAJEN*

Leitura ida maski superfisiál de'it ba testu, bele hatudu paralelu interesante ruma entre lala'ok sira multiplikasaun paun nian no libertasaun Maromak nia Povu nian husi eskravaun Ejitu nian, ho Jezús nia papél nu'udar Moisés, libertadór povu nian. Iha kedas nia hahú maka hatudu faktu ida-ne'e, xave leitura ida atu komprende katekeze ida-ne'e: João hakarak apresenta Jezús nia asaun nu'udar asaun libertadora ida; halo Povu sai husi rai atan nian hodi bá rai liberdade nian. Katekeze ne'e desenvolve liuhusi pasu oioin:

1. Hahú referénsia ida ba “pasajen tasi nian” (ne'ebé iha realidade bee-lihun ida); referénsia ida ne'e bele alude ba pasajen Tasi Mean nian ne'ebé Moisés ho Povu livre husi Ejitu halo (kf. Ex 14,15-31). Objetivu finál Jezús nian maka, loos duni, halo Povu ne'ebé akompaña nia hakat husi rai atan nian bá rai liberdade nian.
2. Hanesan akontese ho Moisés, hamutuk ho Jezús bá ema lubun-boot ida. Ema lubun-boot ne'ebé akompaña Jezús pretende “haree milagre sira ne'ebé Nia halo ho moras sira” (vers. 2). Liafuan gregu ne'ebé uza iha-ne'e (“asthenês” – “ema-moras”) atu dehan, enjerál, ema ruma ne'ebé iha situasaun kamerik/frakeza boot nia laran. Ema lubun-boot tuir Jezús, atu haree sinál sira ne'ebé nia halo no reprezenta ema nia libertasaun husi ninia frakeja no fragilidade. Ne'e maka Povu ida marka ho opresaun, ne'ebé hakarak koko libertasaun. Sira komprende tiha ona katak Jezús mesak, nu'udar libertadór, sei konsege tulun sira supera sira-nia kondisaun mamukit no eskravaun nian.
3. Jezús – ita-nia testu dehan – sae ba “foho ida” (vers. 3). Referénsia ba “foho” lori ita ba kontestu Aliansa Sinai nian no ba foho ne'ebé Maromak oferese ba Povu, liuhusi Moisés, ukun-fuan sira. Hateten katak Jezús sae ba “foho” signifika hateten katak liuhusi Jezús maka sei realiza Aliansa foun entre Maromak no Povu ema livre nian ne'ebé, ho Jezús, “hakat tasi” iha diresaun bá rai liberdade nian.
4. Referénsia ba Páskua ne'ebé besik daudaun (vers. 4) sai referénsia folin-laek, se sira la hela iha kontestu libertasaun Povu nian husi moris-atan. Iha Jezús nia época, Páskua maka festa libertasaun no konstituisaun Povu Maromak nian; maibé mós festa ne'ebé haklaken tempu futuru ida iha-ne'ebé Mesias sei liberta ho modu definitivu Maromak nia Povu. Iha tempu ne'e, Povu tenke sae ba Jerusalém atu iha “foho” uma-orasaun nian, selebra libertasaun; iha kontrapartida, ema lubun-boot tuir Jezús ba “foho” seluk, iha tasi sorin seluk.... Povu hahú liberta an husi naha-todan instituisaun judaika no komprende katak ho Jezús maka sei inaugura tempu foun liberdade no dame nian.
5. Ema lubun-boot ne'ebé tuir Jezús hamlaha no la soi ai-han ruma (vers. 5-6). Referénsia ne'e lori ita, dala ida tan, ba Êzodu, ba rai-fuik maran, bainhira Povu ne'ebé la'o bá rai liberdade nian sente hamlaha. Entaun, Maromak mak hatán ba Povu nia nesesidade no fô ai-han ba nia ho abundánsia; iha ne'e, Jezus ne'ebé nota ema lubun-boot nia nesesidadede buka atu fô solusaun. Halo nune'e, Nia hatudu Maromak nia domin no laran-sadia, nafatin matan-moris ba nia Povu nia nesesidade sira.

6. Solusaun ida-ne'ebé maka Jezús sei fó ba ema lubun-boot nia "hamlaha"? Bainhira buka solusaun, Jezús envolve comunidade eskolante/dixípulu sira-nian ("Ita bele sosa paun iha ne'ebé loos atu fó han ema sira ne'e?" – vers. 5). Jezús nia comunidade (dixípulu sira no konserteza inklui Nia) tenke sente responsavel ba ema sira nia "hamlaha" no tenke sente katak ninia responsabilidade no misaun maka habosu "hamlaha" ne'e. João nota katak Jezús tau kestaun ne'e ba eskolante sira (Filipe maka representante) atu "koko" sira (vers. 6). Bele mós hatuur kestaun ho forma tuimai ne'e: oinsá maka comunidade dixípulu sira-nian – forma an iha Jezús nia eskola no valór sira – hakarak hatán ba mundu nia hamlaha? Hodi uza sistema ekonómiki agora nian, ne'ebé bazeia ba egoizmu no kbiit osan nian no tau soin sira iha ema balun de'it nia liman, hodi hamosu lójika ida opresaun nian, dependénsia no nesesidade nian? Karik ida-ne'e maka sistema mundu foun no livre ne'ebé Jezús hakarak harii? Jezús nia eskolante sira halo tuir liña sistema opresór ida-ne'e, bazeia ba sasosak (hahalok sosa nian), fafa'an 9hahalok fa;an nian) no lukru, ka sira komprende ona katak Jezús iha proposta foun atu halo, ne'ebé sai bee-matan libertasaun no vida abundánsia nian ba ema hotu?
7. Filipe konstata imposibilidade atu rezolve problema, iha kuadru ekonómiku ne'ebé vigora hela. "Osan atus rua mos sei la to'o atu ema ida-ida simu paun baluk oan ida" (vers. 7). Osan/denáriu ida vale saláriu baze loron ida serbisu nian; nune'e, osan serbisu liu tinan sorin nian la to'o atu rezolve problema. Ho liafuan seluk: hodi konfia iha sistema ne'ebé vigora hela (sosa, fa'an, katak sistema ekonómiku lukru egoísta nian) imposivel rezolve problema kona-ba ema-hamlaha sira nia nesesidade. Nune'e, Jezús nia comunidade hetan konvite, atu abandona sistema ida-ne'e no buka seluk...
8. André fali, haree solusaun diferente ida (vers. 8-9). Apóstolu ida-ne'e representa, iha Jezús nia comunidade, kategoria ema sira nian ne'ebé adere ba Jezús ho konvikasaun, iha intimidade ho Jezús no nune'e', konxiente liután ho Jezús nia proposta sira. Maski nune'e, André ladún konvensidu ho rezultadu sira ("ne'e to'o oinsá loos ba ema barak ne'e?"). Ba André, di'ak tebes bele hetan sistema seluk diferente husi sistema esploradór; maibé buat ne'e la rezulta... Jezús sei fó prova katak posivel hetan sistema seluk ne'ebé fahe moris no halakon lójika esplorasau nian.
9. "Labarik" nia figura ne'ebé mosu de'it iha sena multiplikasaun paun sira nian iha João nia versaun maka figura ida presiza-laek husi pontudevista narrasaun nian: ba rezultadu finál, hanesan de'it se maka maksoik paun no ikan nian: labarik ida ka adultu ida. Entaun, tanba sá mak João insiste atu ko'alia kona-ba labarik ida? Tanba figura "labarik nian" signifkativa liu: ba ninia idade no ba ninia kondisaun, nia ema fraku ida, husi aspetu fíziku no sosiál. Nia representa Jezús nia comunidade nia kamerik/frakeja hasoru mundu nia nesesidade boboot sira. Liafuan gregu ne'ebé João uza atu ko'alia kona-ba labarik signifika "labarik" no "atan": comunidade ne'ebé "labarik" ne'e representa, iha mundu nia oin nia maka grupu sosiál haraik-an ida, lahó pretensaun ruma ba podér no ukun, dedika an atu serví ema sira. Komunitade simples no haraik-an, simu bolun ba servisu, bolun atu rezolve ema kiak sira nia nesesidade no harii sistema foun, sistema libertadór. Sá loos sistema ida-ne'e?
10. Númeru "lima" (paun) no "rua" (ikan), la mosu de'it nune'e: ninia tatusik/adisaun fó "hitu" – númeru ne'ebé signifika tatomak/totalidade... Katak: iha partilla totalidade nian ne'ebé comunidade soi maka bele hatán ba ema sira nia nesesidade. Ne'e maka totalidade baluk nian no ho tipu lahanesan maibé, se tau ba maun-alin sira nia servisu, bele habosu mundu nia hamlaha.
11. Kona-ba hahán ne'ebé comunidade hasae, Jezús "fó agradese" (vers. 11). "Fó agradese" signifika rekoñese katak soin sira maka presente mai husi Maromak. Ora, rekoñese katak sira maka don Maromak nian signifika maksoik emak tenke husik nia, atu bele rekoñese katak sira maka don gratuitu ne'ebé Maromak oferese ba ema; no Maromak la oferese ba balun no lae ba seluk... "Fó agradese" signifika rekoñese katak soin ne'ebé simu pertense

ba ema hotu no sira ne'ebé soi maka adimistrador de'it ho knaar atu tau ba maun-alin hotu nia dispozisaun, ho gratuidade hanesan oinsá nia simu soin sira ne'e. Nune'e, soin sira livre husi ema eskuzivu de'it nia posesu, bele sai Maromak nia don ba ema hotu. Ida-ne'e maka sistema ne'ebé Maromak hakarak harii iha mundu; no comunidade sarani simu bolun atu fó sasin kona-ba lójika ida-ne'e.

12. Habosu tiha mundu nia hamlaha, liuhusi soin sira ne'ebé comunidade simu husi Maromak no tau atu serví ema hotu, eskolante sira simu bolun ba knaar seluk. Iha baluk resin sira ne'ebé la bele lakon, maibé tenke sai hun ba abundánsia seluk. Presiza nafatin hakbarak domin no paun... No comunidade, hatene tiha Jezús nia projetu, tenke uza buat ne'ebé soi atu kontinua oferese moris ba ema sira. Referénsia ba luhu 12 ne'ebé eskolante sira halibur bele sai aluzaun ida ba Israel (tribu 12): se comunidade dixípulu sira-nian hatene partilla buat ne'ebé simu husi Maromak nia bele habosu Povu tomak nia hamlaha (vers. 12-13).
13. Sira balu ne'ebé testemuña multiplikasaan paun no ikan nian konxiente katak Jezús maka Mesias ne'ebé tenke mai atu fó moris iha abundánsia ba nia Povu no hakarak halo nia sai liurai (vers. 14-15). Jezús la aseita... Nia la mai atu rezolve mundu nia problema hodi harii sistema ida autoridade no poder nian; maibé nia mai konvida ema sira atu moris iha lójika ida partilla no solidariedade nian, ne'ebé sai don no servisu iha haraik-an ba maun-alin sira. Ho forma ida-ne'e maka Nia propoin – ho eskolante sira nia kolaborasaun – atu elimina sistema opresór, responsavel ba hamlaha no mamukit. Mundu foun ne'ebé Jezús mai propoin la hatuur iha lójika ida poder no autoridade nian, maibé iha servisu simples ne'ebé lori atu partilla moris ho maun-alin sira.

Pasajen ne'ebé ohin propoin mai ita hakarak apresenta Maromak nia projetu ne'ebé Jezús realiza nu'udar projetu libertasaun nian, ne'ebé sei elimina opresaun no harii mundu foun ema livre sira nian, salva husi egoizmu no ho kbiit atu hadomi no fahe. Hasoru sistema bazeia ba lukru no esplorasau, Jezús propoin atitude foun ida. Presiza troka egoizmu ho domin no partilla. Jezús nia comunidade iha funsaun atu deskobre lójika ne'e, simu no propoin ba mundu. Nia tenke aprende katak soin sira maka Maromak nia don, ba ema hotu. Halo nune'e, nia harii daudaun sistema foun no liberta ema husi kondisionamentu egoísta sira ne'ebé hamosu injustisa, nesiedade, falta, frakeza, taterus. Sé hakarak akompaña Jezús iha dalan ne'e, sei hakat husi moris-atan lukru nian bá liberdade partilla nian, servisu nian, domin nian ba maun-alin sira.